



# SLUŽBENE NOVINE TUZLANSKO-PODRINJSKOG KANTONA

Godina 2 - Broj 2

Ponedjeljak, 17. juli/srpanj 1995.  
TUZLA

Izdanje na  
bosanskom i hrvatskom  
jeziku

66

Na osnovu člana 24. stava 1. tačke e) Ustavnog zakona Tuzlansko-podrinjskog kantona ("Službene novine Tuzlansko-podrinjskog kantona" br. 1/94) i člana 102. Poslovnika o radu Skupštine Tuzlansko-podrinjskog kantona ("Službene novine Tuzlansko-podrinjskog kantona" broj 1/94), Skupština Tuzlansko-podrinjskog kantona, na sjednici održanoj 16. 7. 1995. godine, donijela je

## DEKLARACIJU

### O ZAUSTAVLJANJU I SPRIJEČAVANJU DALJEG GENOCIDA NAD NARODOM SREBRENICE

Ovo nije običan rat. U Bosni i Hercegovini agresor vodi rat protiv svih civila, vršeći zločin genocida posebno nad Bošnjacima i Hrvatima. Srpski agresor je javno proklamovao svoj cilj da na prostorima koje je okupirao potpuno uništi Bošnjake i Hrvate. Radi ostvarivanja toga cilja vrše se masovna ubistva nezaštićenih civila - žena, djece i staraca. Organizovani su i koncentracioni logori čije su slike užasnule civilizovani svijet. Veliki koncentracioni logori su zbog toga, u međuvremenu, zamijenjeni sa ako 150 manjih zatvora, u kojima se svakodnevno na zločinački način ubijaju Bošnjaci i Hrvati.

Agresor već više od dvije godine drži u okruženju gradove istočne Bosne i Bosanske krajine koje su UN proglasile zaštićenim zonama.

Ljudi u zaštićenim zonama UN-a mjesecima ne dobivaju hranu, vodu, električnu energiju, lijekove i druge osnovne potrebe za život.

Konvoje koji nose humanitarnu pomoć agresor vraća ili oduzima naočigled prisutnih snaga UN-a. Zaštićene zone UN-a su izložene svakodnevnom artiljerijskom granatiranju čija je jedina svrha da se ubije što više Bošnjaka i Hrvata.

Od vlade i parlamenata zemalja članica Ujedinjenih nacija od početka agresije na RBiH zahtijevano je da, u skladu sa Konvencijom o spriječavanju i kažnjavanju zločina genocida i međunarodnim pravom, pomognu ljudima koje ubijaju samo zato što su Bošnjaci i Hrvati. Upozoreno je da će, ukoliko se zločin genocida sada ne spriječi i ne kazni, to značiti legalizaciju genocida kao sredstva za ostvarivanje političkih ciljeva i potpuni poraz svih normi međunarodnog prava.

I, umjesto da međunarodna zajednica učini ono što je dužna i na šta se sama obavezala, svojim nečinjenjem postala je saučesnik u zločinu genocida nad narodom Srebrenice a sada mirno promatra i napade na Žepu. Ni jedno od sredstava, koje joj je bilo na raspolaganju, nije upotrijebila. Naprotiv, korak po korak, dopustila je da četnici uđu među nenaoružan narod Srebrenice i dovrše sve segmente zločina genocida: ubijaju narod Srebrenice, muče ga na još neviđene načine u historiji ratovanja, izgladnjuju i podvrgavaju životnim uslovima koji treba da dovedu do potpunog fizičkog uništenja Bošnjaka u Srebrenici. Siledžijskim odnosom i silovanjem djevojaka i žena spriječavaju rađanje Bošnjaka. Prinudno odvajaju djecu od roditelja i rodbine. Do danas su protjerali 24.000 Bošnjaka iz Srebrenice - staraca, žena i djece. Dječake starije od 13 godina kao i odrasle muškarce i probrane djevojke izdvajaju i odvođe ko zna kuda. Onemogućavaju evakuaciju teških ranjenika i ometaju evakuaciju civila. Iako se radi o narodu iz demilitarizirane zone koja je pod pokroviteljstvom Ujedinjenih nacija, Ujedinjene nacije su dopustile da taj narod danima, nakon torture četnika, čeka pod otvorenim nebom na temperaturi preko 30° C dok se oni nisu smilovali i dali im mrvu hljeba, vode, šator.

I

Optužujemo UN i UNPROFOR:

1. Zbog nepoštovanja Povelje o osnovnim ljudskim pravima.

2. Zbog neprovođenja nijedne rezolucije niti drugog akta UN donesenog od početka agresije na RBiH - izuzev Rezolucije o uvođenju embarga na naoružanje državi BiH.

3. Zbog nepoštovanja mandata koji imaju institucije i funkcioneri UN i UNPROFOR-a.

4. Naročito zbog neprovođenja i kršenja ugovora o zaštiti i demilitarizaciji Srebrenice, jer su razoružali pa predali narod Srebrenice agresoru - usljed čega se ništa ne zna o sudbini više od 20.000 ljudi.

5. Zbog saučesništva u protjerivanju naroda Srebrenice; što nije htio da ih primi u svoje kampove; što, i kada ih je pod pritiskom primio - ponižavajuće ih zbrinuo, ne pružajući im svoju, a, onemogućavajući i zabranjujući pomoć lokalnih ljekarskih ekipa.

6. Što humanitarnu pomoć za potrebe naroda Srebrenice i nadalje šalje konvojima iz Srbije u području gdje tog naroda više nema - umjesto da pomoć dovoze na Aerodrom "Tuzla", u područje gdje je najlakše tu pomoć dopremiti do naroda.

7. Što, i pored očiglednih saznanja o kontinuiranom učešću vojnih formacija iz tzv. Jugoslavije u agresiji na RBiH, pred tim zatvaraju oči i uporno produžavaju ublažavanje sankcija.

Optužujemo svjetske medije - zbog podrške agresorskoj propagandi, izražene kroz prikazivanje ratnog zločinca Ratka Mladića u ciničnoj i ponižavajućoj misiji humanitarca i dobrotvorca prema djeci Srebrenice.

## II

Zahtijevamo:

1. Od Međunarodnog komiteta crvenog križa da se odmah u Srebrenicu, Bratunac, Novu Kasabu, Konjević Polje, Vlasenicu i Batkoviće, upute njihove komisije koje će ustanoviti broj zarobljenih osoba i stanje u kome se nalaze, te da osiguraju njihovo oslobađanje i siguran dolazak na slobodnu teritoriju RBiH.

2. Da se ne vrši organizovano raseljavanje prognanika iz Srebrenice van slobodnih teritorija RBiH.

3. Da UN odmah osiguraju sredstva za humani smještaj prognanika, prema međunarodnim standardima, te da preuzmu brigu o potpunom zbrinjavanju prognanika iz Srebrenice smještenih na slobodnoj teritoriji RBiH - sve do ponovnog uspostavljanja sigurnosne i demilitarizirane zone Srebrenica.

4. Da snage UNPROFOR-a budu postavljene na međunarodno priznate granice RBiH sa Srbijom i Crnom Gorom.

5. Da se temeljito preispita sprovođenje sadašnjeg mandata UNPROFOR-a u RBiH.

6. Da Predsjedništvo RBiH podnese zahtjev za pokretanje krivičnog postupka kod Međunarodnog suda u Hagu protiv Butros Butros Galija, Jasuši Akašija i drugih funkcionera, odnosno odgovornih lica UN, kao saučesnika u zločinu genocida protiv naroda Srebrenice i naroda RBiH.

7. Hitno preduzimanje potrebnih preventivnih pa i vojnih akcija NATO-a u cilju sprečavanja scenarija iz Srebrenice u demilitariziranoj zoni Žepa i svim sigurnosnim zonama u RBiH.

## III

Podržavamo:

1. Zahtjev republičkih organa upućen UN da odmah uspostave proklamovanu sigurnosnu i demilitariziranu zonu Srebrenice - uz upotrebu svih sredstava koja im stoje na raspolaganju.

2. Pismo predsjednika Predsjedništva RBiH upućeno predsjedniku Francuske u kojem prihvata njegovu ponudu da novoformirane snage za brza dejstva iz Francuske budu te koje će odmah uspostaviti sigurnosnu i demilitariziranu zonu Srebrenice.

3. Zahtjev republičkih vlasti za podizanje embarga na naoružanje Republici BiH.

## IV

Ovu Deklaraciju dostaviti: narodima zemalja članica UN; Savjetu bezbjednosti UN; Evropskom parlamentu; Generalnom sekretaru NATO pakta Vili Klasi; predsjednicima zemalja članica kontakt grupe UN; predsjednicima zemalja kontakt grupe islamskih zemalja; Evropskoj zajednici; državnim organima R/F BiH; parlamentarnim strankama Skupštine Tuzlansko-podrinjskog kantona.

## V

Ovu Deklaraciju objaviti u "Službenim novinama Tuzlansko-podrinjskog kantona".

Republika Bosna i Hercegovina  
Federacija Bosne i Hercegovine

Predsjedavajući

Skupštinom Tuzlansko-podrinjskog kantona,

**Mustafa Ramić, v.r.**

TUZLANSKO-PODRINJSKI  
KANTON  
Skupština

Broj: 01-011-247/95

Tuzla, 16. 7. 1995. g.

## 66

Na temelju članka 24. stavka 1. točke e) Ustavnog zakona Tuzlansko-podrinjskog kantona ("Službene novine Tuzlansko-podrinjskog kantona" br. 1/94) i članka 102. Poslovnika o radu Skupštine Tuzlansko-podrinjskog kantona ("Službene novine Tuzlansko-podrinjskog kantona" broj 1/94), Skupština Tuzlansko-podrinjskog kantona, na sjednici održanoj 16. 7. 1995. godine, donijela je

## DEKLARACIJU

### O ZAUSTAVLJANJU I SPRIJEČAVANJU DALJEG GENOCIDA NAD NARODOM SREBRENICE

Ovo nije običan rat. U Bosni i Hercegovini agresor vodi rat protiv svih civila, vršeći zločin genocida posebno nad Bošnjacima i Hrvatima. Srpski agresor je javno proklamirao svoj cilj da na prostorima koje je okupirao potpuno uništi Bošnjake i Hrvate. Radi ostvarivanja toga cilja vrše se masovna ubojstva nezaštićenih civila - žena, djece i staraca. Organizirani su i koncentracioni logori čije su slike užasnule civilizovani svijet. Veliki koncentracioni logori su zbog toga, u međuvremenu, zamijenjeni sa oko 150 manjih zatvora, u kojima se svakodnevno na zločinački način ubijaju Bošnjaci i Hrvati.

Agresor već više od dvije godine drži u okruženju gradove istočne Bosne i Bosanske krajine koje su UN proglasile zaštićenim zonama.

Ljudi u zaštićenim zonama UN-a mjesecima ne dobivaju hranu, vodu, električnu energiju, lijekove i druge osnovne potrebe za život.

Konvoje koji nose humanitarnu pomoć agresor vraća ili oduzima na očevid prisutnih snaga UN-a. Zaštićene zone UN-a su izložene svakodnevnom topničkom granatiranju čija je jedina svrha da se ubije što više Bošnjaka i Hrvata.

Od vlade i parlamenata zemalja članica Ujedinjenih nacija od početka agresije na RBiH zahtijevano je da, sukladno sa Konvencijom o spriječavanju i kažnjavanju zločina genocida i međunarodnim pravom, pomognu ljudima koje ubijaju samo zato što su Bošnjaci i Hrvati. Upozoreno je da će, ukoliko se zločin genocida sada ne spriječi i ne kazni, to značiti legalizaciju genocida kao sredstva za ostvarivanje političkih ciljeva i potpuni poraz svih normi međunarodnog prava.

I, umjesto da međunarodna zajednica učini ono što je dužna i na šta se sama obvezala, svojim nečinjenim postala je saučesnik u zločinu genocida nad narodom Srebrenice a sada mirno promatra i napade na Žepu. Ni jedno od sredstava, koje joj je bilo na raspolaganju, nije uporabila. Naprotiv, korak po korak, dopustila je da četnici uđu među nenaoružan narod Srebrenice i dovrše sve segmente zločina genocida: ubijaju narod Srebrenice, muče ga na još neviđene načine u povijesti ratovanja, izgladnjuju i podvrgavaju životnim uvjetima koji treba da dovedu do potpunog

tjelesnog uništenja Bošnjaka u Srebrenici. Siledžijskim odnosom i silovanjem djevojaka i žena sprječavaju rađanje Bošnjaka. Prinudno odvajaju djecu od roditelja i rodbine. Do danas su protjerali 24.000 Bošnjaka iz Srebrenice - staraca, žena i djece. Dječake starije od 13 godina kao i odrasle muškarce i probrane djevojke izdvajaju i odvođe ko zna kuda. Onemogućavaju evakuaciju teških ranjenika i ometaju evakuaciju civila. Iako se radi o narodu iz demilitarizirane zone koja je pod pokroviteljstvom Ujedinjenih naroda, Ujedinjene nacije su dopustile da taj narod danima, nakon torture četnika, čeka pod otvorenim nebom na temperaturi preko 30° C dok se oni nisu smilovali i dali im mrvu hljeba, vode, šator.

## I

Optužujemo UN i UNPROFOR:

1. Zbog nepoštovanja Povelje o osnovnim ljudskim pravima.
  2. Zbog neprovođenja ni jedne rezolucije niti drugog akta UN donesenog od početka agresije na RBiH - izuzev Rezolucije o uvođenju embarga na naoružanje državi BiH.
  3. Zbog nepoštovanja mandata koji imaju institucije i funkcioneri UN i UNPROFOR-a.
  4. Naročito zbog neprovođenja i kršenja ugovora o zaštiti i demilitarizaciji Srebrenice, jer su razoružali pa predali narod Srebrenice agresoru - usljed čega se ništa ne zna o sudbini više od 20.000 ljudi.
  5. Zbog saučesništva u protjerivanju naroda Srebrenice; što nije htio da ih primi u svoje kampove; što, i kada ih je pod pritiskom primio - ponižavajuće ih zbrinuo, nepružajući im svoju, a, onemogućavajući i zabranjujući pomoć lokalnih ljekarskih ekipa.
  6. Što humanitarnu pomoć za potrebe naroda Srebrenice i nadalje šalje konvojima iz Srbije u području gdje tog naroda više nema - umjesto da pomoć dovoze na Aerodrom "Tuzla", u područje gdje je najlakše tu pomoć dopremiti do naroda.
  7. Što, i pored očevitih saznanja o kontinuiranom učešću vojnih formacija iz tzv. Jugoslavije u agresiji na RBiH, pred tim zatvaraju oči i uporno produžavaju ublažavanje sankcija.
- Optužujemo svjetske medije - zbog potpore agresorskoj propagandi, izražene kroz prikazivanje ratnog zločinca Ratka Mladića u ciničnoj i ponižavajućoj misiji humanitarca i dobrotvorca prema djeci Srebrenice.

## II

Zahtijevamo:

1. Od Međunarodnog komiteta crvenog križa da se odmah u Srebrenicu, Bratunac, Novu Kasabu, Konjević Polje, Vlasenicu i Batkoviće, upute njihove komisije koje će ustanoviti broj zarobljenih osoba i stanje u kome se nalaze, te da osiguraju njihovo oslobađanje i siguran dolazak na slobodnu teritoriju RBiH.
2. Da se ne vrši organizirano raseljavanje prognanika iz Srebrenice van slobodnih teritorija RBiH.
3. Da UN odmah osiguraju sredstva za humani smještaj prognanika, prema međunarodnim standardima, te da preuzmu skrb o potpunoj opskrbi prognanika iz Srebrenice smještenih na slobodnoj teritoriji RBiH - sve do ponovnog uspostavljanja sigurnosne i demilitarizirane zone Srebrenica.
4. Da snage UNPROFOR-a budu postavljene na međunarodno priznate granice RBiH sa Srbijom i Crnom Gorom.
5. Da se temeljito preispita sprovođenje sadašnjeg mandata UNPROFOR-a u RBiH.
6. Da Predsjedništvo RBiH podnese zahtjev za pokretanje krivičnog postupka kod Međunarodnog suda u Hagu protiv Butros Butros Galija, Jasuši Akašija i drugih funkcionera, odnosno odgovornih osoba UN, kao sudjelatnika u zločinu genocida protiv naroda Srebrenice i naroda RBiH.

7. Hitno preduzimanje potrebnih preventivnih pa i vojnih akcija NATO-a u cilju sprečavanja scenarija iz Srebrenice u demilitariziranoj zoni Žepa i svim sigurnosnim zonama u RBiH.

## III

Podržavamo:

1. Zahtjev republičkih organa upućen UN da odmah uspostave proklamovanu sigurnosnu i demilitariziranu zonu Srebrenice - uz uporabu svih sredstava koja im stoje na raspolaganju.
2. Pismo predsjednika Predsjedništva RBiH upućeno predsjedniku Francuske u kojem prihvata njegovu ponudu da novoformirane snage za brza dještva iz Francuske budu te koje će odmah uspostaviti sigurnosnu i demilitariziranu zonu Srebrenice.
3. Zahtjev republičkih vlasti za podizanje embarga na naoružanje Republici BiH.

## IV

Ovu Deklaraciju dostaviti: narodima zemalja članica UN; Savjetu sigurnosti UN; Evropskom parlamentu; Generalnom tajniku NATO pakta Vili Kласu; predsjednicima zemalja članica kontakt skupine UN; predsjednicima zemalja kontakt skupine islamskih zemalja; Evropskoj zajednici; državnim organima R/F BiH; parlamentarnim strankama Skupštine Tuzlansko-podrinjskog kantona.

## V

Ovu Deklaraciju objaviti u "Službenim novinama Tuzlansko-podrinjskog kantona".

Republika Bosna i Hercegovina  
Federacija Bosne i Hercegovine

Predsjedavajući  
Skupštinom Tuzlansko-podrinjskog kantona,  
**Mustafa Ramić, v.r.**

TUZLANSKO-PODRINJSKI  
KANTON  
Skupština  
Broj: 01-011-247/95  
Tuzla, 16. 7. 1995. g.

67

Na osnovu člana 3. Uredbe o obrazovanju Kabineta Predsjednika Kantona ("Sl. novine Tuzlansko-podrinjskog kantona", br 3/94) Predsjednik Kantona donosi

## ODLUKU O IMENOVANJU SAVJETNIKA

## I

Za savjetnika u Kabinetu Predsjednika Tuzlansko-podrinjskog kantona, za oblast privrede, imenuje se VEHBILJA FAZLIĆ, dipl. ecc iz Tuzle.

## II

Ova odluka biće objavljena u "Sl. novinama Tuzlansko-podrinjskog kantona".

Republika Bosna i Hercegovina  
Federacija Bosne i Hercegovine

Predsjednik  
TUZLANSKO-PODRINJSKOG  
KANTONA

TUZLANSKO-PODRINJSKI  
KANTON  
Predsjednik  
Broj: 01/1-589/95.  
Tuzla, 26. 07. 1995. god.

68

Na osnovu člana 6. i člana 25. stav 1. Zakona o Vladi Tuzlansko-podrinjskog kantona ("Službene novine TPK" br. 2/94), i Odluke o načinu obezbjeđenja funkcionisanja organa državne

uprave u opštinama u kojima ovi organi ne izvršavaju svoja prava i dužnosti ("Službeni list R BiH", br. 5/92) na prijedlog Ministarstva za boračka pitanja, Vlada Kantona, na sjednici od 6. 6. 1995. godine, donosi

## UREDBU

### O VRŠENJU UPRAVNIH I DRUGIH STRUČNIH POSLOVA ZA KORISNIKE BORAČKO-INVALIDSKE ZAŠTITE SA OPŠTINA ČIJA JE TERITORIJA U CJELOSTI POD PRIVREMENOM OKUPACIJOM AGRESORA

#### Član 1.

Uredbom o vršenju upravnih i drugih stručnih poslova za korisnike boračko-invalidske zaštite sa opština čija je teritorija u cjelosti pod privremenom okupacijom agresora (u daljem tekstu: uredba), određuje se nadležnost organa uprave za boračka pitanja opština u kojima su privremeno nastanjeni korisnici prava iz boračko-invalidske zaštite sa opština: Vlasenica, Bijeljina i Šekovići čija je teritorija u cjelosti pod privremenom okupacijom agresora, način utvrđivanja korisnika prava iz boračko-invalidske zaštite, te način uspostavljanja saradnje sa matičnim opštinama.

#### Član 2.

Opštinski sekretarijat za boračka pitanja slobodnih opština Tuzlansko-podrinjskog kantona na čijoj teritoriji su privremeno nastanjene porodice šehida, ratni vojni invalidi i demobilisani borci opština čija je teritorija u cjelosti pod privremenom okupacijom agresora obavljat će za ove kategorije lica upravne i druge stručne poslove iz svog djelokruga.

#### Član 3.

Na osnovu izvršenog popisa i službene evidencije Ministarstva za rad, socijalnu politiku i izbjeglice, a putem opštinskih sekretarijata za raseljena i prognana lica utvrdit će se mjesna nadležnost sekretarijata za boračka pitanja iz člana 2. ove Uredbe.

#### Član 4.

Načelnik opštine čija je teritorija u cjelosti pod privremenom okupacijom agresora imenovat će stručnog saradnika za boračko-invalidsku zaštitu koji će voditi evidenciju lica iz člana 2. ove Uredbe i ostvarivati saradnju sa opštinskim sekretarijatima za boračka pitanja u svim pitanjima do značaja za realizaciju prava iz boračko-invalidske zaštite.

Prioritet raspoređivanja na poslove i radne zadatke iz stava 1. ovog člana imaju članovi porodica šehida, ratni vojni invalidi i borci sa visokom stručnom spremom - pravni fakultet ili drugi fakultet društvenog smjera, vodeći računa o odredbama Uredbe o kriterijima i normativima raspoređivanja građana i materijalnih sredstava u oružane snage i druge potrebe odbrane ("Sl. list R BiH", broj 19/92) - poglavlje 7. Popuna državnih organa.

#### Član 5.

U pogledu materijalne pomoći ovom Uredbom preuzete kategorije korisnika boračko-invalidske zaštite u potpunosti će se izjednačiti sa korisnicima prava koji imaju prebivalište u toj opštini.

#### Član 6.

Odredbes ove uredbe primjenjivat će se na slobodnoj teritoriji opštine Srebrenica.

#### Član 7.

Ova uredba stupa na snagu danom donošenja, a objavit će se u "Službenim novinama Tuzlansko-podrinjskog kantona".

Republika Bosna i Hercegovina  
Federacija Bosne i Hercegovine

Predsjednik  
TUZLANSKO-PODRINJSKOG  
KANTONA

TUZLANSKO-PODRINJSKI  
KANTON  
VLADA

Izet Hadžić v.r.

Broj: 02/1-012-2252/95.  
Tuzla, 6. 6. 1995. godine

## 69

Na osnovu člana 6. i člana 25. stav 2. Zakona o Vladi Tuzlansko-podrinjskog kantona ("Sl. novine Tuzlansko-podrinjskog kantona", broj: 2/94) i tačke 2. stav 4. Uputstva o odgojnom obrazovnom radu predškolskih ustanova, osnovnih i srednjih škola za vrijeme ratnog stanja ("Službeni list R BiH", broj: 4/94) Vlada Tuzlansko-podrinjskog kantona, na Prijedlog Ministarstva za obrazovanje, nauku, kulturu i sport Tuzlansko-podrinjskog kantona, na sjednici održanoj 6. 6. 1995. godine, donosi

## ODLUKU

### O ZAVRŠETKU ŠKOLSKE 1994/95. GODINE

#### I

Sve osnovne i srednje škole na području Tuzlansko-podrinjskog kantona, na osnovu realizovanih od 26-30 radnih sedmica, zaključno sa 6. 6. 1995. godine, završavaju nastavno-časovnu školsku 1994/95. godinu.

#### II

Instruktivno-konsultativna nastava se nastavlja.

O načinu obavljanja ove nastave učenici i nastavno osoblje će biti informisani uputstvima koje će Ministarstvo za obrazovanje, nauku, kulturu i sport Tuzlansko-podrinjskog kantona dostaviti Prosvjetno-pedagoškom zavodu u Tuzli, a preko općinskih sekretarijata društvenih djelatnosti, i svim osnovnim i srednjim školama na području kantona.

#### III

Škole su dužne da organizuju provjeru znanja za:  
a/ neocijenjene učenike iz pojedinih nastavnih predmeta, gdje predmet nije bio zastupljen,  
b/ sve učenike koji imaju slabe ocjene, ako su savladali programske sadržaje, koji žele popraviti ocjene i  
c/ da poprave ocjene ako učenici žele bolji uspjeh.  
Škole su dužne da organizuju razredne ispite za učenike koji iz opravdanih razloga nisu ocijenjeni, a zakon im to omogućava.

#### IV

Nerealizovani programski sadržaji nastave tekuće školske godine realizovaće se početkom naredne školske godine.

#### V

Zaposleni u ustanovama obrazovanja su obavezni, u cilju provođenja ove odluke, da preduzmu potrebne mjere i da redovno izvršavaju sve poslove iz svog djelokruga, po osnovu radne obaveze.

## VI

Ova odluka će biti objavljena u "Službenim novinama Tuzlansko-podrinjskog kantona".

Republika Bosna i Hercegovina  
Federacija Bosne i Hercegovine

Predsjednik  
TUZLANSKO-PODRINJSKOG  
KANTONA

TUZLANSKO-PODRINJSKI  
KANTON  
VLADA

Broj: 02/1-60-3328/95.  
Tuzla, 16. 6. 1995.

70

Na osnovu člana 31. st. 2. Zakona o ministarstvima i drugim organima uprave Tuzlansko-podrinjskog kantona ("Sl. novine TPK" br. 3/94) Vlada Kantona na sjednici od 6. 6. 1995. god. donosi:

**ODLUKU**

**O DAVANJU SAGLASNOSTI NA PRAVILNIK O  
IZMJENAMA I DOPUNAMA PRAVILNIKA O  
UNUTRAŠNJOJ ORGANIZACIJI I SISTEMATIZACIJI  
RADNIH MJESTA U MINISTARSTVU ZA RAD,  
SOCIJALNU POLITIKU I IZBJEGLICE**

## I

Daje se saglasnost na Pravilnik o izmjenama i dopunama Pravilnika o unutrašnjoj organizaciji i sistematizaciji radnih mjesta u Ministarstvu za rad, socijalnu politiku i izbjeglice.

## II

Ova odluka stupa na snagu odmah, a biće objavljena u "Službenim novinama Tuzlansko-podrinjskog kantona".

Republika Bosna i Hercegovina  
Federacija Bosne i Hercegovine

Predsjednik  
TUZLANSKO-PODRINJSKOG  
KANTONA

TUZLANSKO-PODRINJSKI  
KANTON  
VLADA

Broj: 02/1-012-3155/95.  
Tuzla, 6. 6. 1995. god.

71

Na osnovu člana 6. Zakona o Vladi Tuzlansko-podrinjskog kantona ("Sl. novine Tuzlansko-podrinjskog kantona" br. 2/94) a u vezi sa odredbama Zakona o kontroli cijena ("Sl. novine Federacije BiH" br. 2/95), Vlada Kantona, na sjednici održanoj 29. 06. 1995. g. donosi:

**ODLUKU**

**O UTVRĐIVANJU ZAŠTITNIH CIJENA ODREĐENIH  
POLJOPRIVREDNIH PROIZVODA**

## I

Vlada Kantona, u vršenju kontrole cijena, utvrđuje zaštitne cijene (minimalno - otkupne) za slijedeće poljoprivredne proizvode:

- |                             |                 |
|-----------------------------|-----------------|
| 1. KROMPIR zaštitna cijena  | 0,50 DM po 1 kg |
| 2. KUPUS zaštitna cijena    | 0,30 DM po 1 kg |
| 3. CRNI LUK zaštitna cijena | 0,70 DM po 1 kg |
| 4. GRAH zaštitna cijena     | 1,20 DM po 1 kg |

## II

O propisanoj mjeri neposredne kontrole cijena, Vlada Kantona je dužna obavijestiti Skupštinu Kantona u roku od 15 dana od dana propisivanja mjere.

## III

Ova odluka stupa na snagu danom objavljivanja u "Sl. novinama Tuzlansko-podrinjskog kantona".

Republika Bosna i Hercegovina  
Federacija Bosne i Hercegovine

Predsjednik Kantona  
TUZLANSKO-PODRINJSKOG  
KANTONA

TUZLANSKO-PODRINJSKI  
KANTON  
VLADA KANTONA

Broj: 02/1-330-3821/95.  
Tuzla, 29. 6. 1995. godine

72

Na osnovu člana 6. Zakona o Vladi Tuzlansko-podrinjskog kantona ("Službene novine Tuzlansko-podrinjskog kantona", broj 2/94) i člana 28. Zakona o raseljenim licima ("Službene novine Federacije", broj 2/95) na prijedlog Okružnog štaba civilne zaštite Tuzla, Vlada Tuzlansko-podrinjskog kantona, na sjednici od 12. 07. 1995. godine donosi

**ODLUKU**

**O OSNIVANJU KRIZNOG ŠTABA ZA PRIHVAT  
PROGNANIKA IZ SREBRENICE**

## I

Ovom odlukom osniva se Krizni štab za prihvata i zbrinjavanje lica koja su u julu 1995. godine protjerana iz Srebrenice na područje Tuzlansko-podrinjskog kantona (u daljem tekstu: Krizni štab)

## II

U Krizni štab imenuju se:

- Ministarstvo za rad i socijalnu politiku prognanika  
Šemsudin Hasanbegović  
Avdić Hajrudin  
Hadžavić Halima
  - Načelnik OKŠ CZ Tuzla  
Porobić Nurija
  - Sekretar Vlade  
Ismet Osmanović
  - Pomoćnik načelnika OKŠ CZ za evakuaciju i PMO  
Mujčinović Dika  
Fazlić Damir
  - Ministarstvo za zdravlje  
Muminhodžić Kasim  
Jozo Đerek  
Zijad Bešlić
  - Predstavnik komisije TPK za zarazne bolesti  
Jusufović Fatima
  - Ministarstvo za unutrašnje poslove  
Hasić Alija
  - Predstavnik stanice javne bezbjednosti sa općine gdje se bude vršio prihvata  
Kladanj  
Živinice
- Busnov Selman  
Bašić Ševal

## 9. Komandanti općinskih štabova

Tuzla	Salihović Šerif
Kladnja	Habibović Merisa
Kalesije	Omerović Rasim
Živinice	Bajrić Hamzalija

## 10. Ministarstvo za promet i komunikacije

Jusufović Avdo  
Isabegović Mustafa

## 11. Predstavnik Kabineta ministra za odnose sa humanitarnim organizacijama

Ibrahimović Muhamed

## 12. Predstavnik Ministarstva za boračka pitanja

Dozić Adib

## III

Zadaci Kriznog štaba su:

- da utvrdi način i pravac evakuacije prognanika,
- da odredi zborna mjesta za prihvat prognanika,
- osigura formiranje kriznih štabova po općinama u kojima će se smjestiti prognanici,
- obezbijedi formiranje ekipa za zdravstvenu trijažu i zdravstveno zbrinjavanje,
- osigura stanje pune pripravnosti općinskih štabova CZ i jedinica CZ opšte namjene u općinama Kladanj i Kalesija, i općinama prihvata: Banovići, Brčko, Gračanica, Lukavac, Srebrenik, Tuzla i Živinice,
- vrši procjenu i prati dinamiku evakuacije,
- predlaže način i mjesto zbrinjavanja,
- predlaže plan razmještanja prognanika po općinama,
- radi na obezbjeđenju materijalno-tehničkih sredstava,
- obezbjeđuje gorivo i prevozna sredstva za prevoz prognanika,
- ostvaruje saradnju sa općinskim štabovima CZ

## IV

Krizni štab je dužan da izvještaj o svom radu dostavlja Vladi i Predsjedniku Kantona svakih 10 dana.

## V

Ova odluka biće objavljena u "Sl. novinama Tuzlansko-podrinjskog kantona".

Republika Bosna i Hercegovina Federacija Bosne i Hercegovine	Predsjednik TUZLANSKO-PODRINJSKOG KANTONA
---	---

TUZLANSKO-PODRINJSKI  
KANTON  
VLADA

Broj: 02/1-53-4107/95.  
Tuzla, 12. 7. 1995. god.

## 73

Na osnovu člana 6. Zakona o Vladi Tuzlansko-podrinjskog kantona ("Službene novine Tuzlansko-podrinjskog kantona" br. 2/94), Vlada Kantona donosi:

**ODLUKU****O KORIŠĆENJU NEUSELJENOG STAMBENOG PROSTORA**

Općine Tuzlansko-podrinjskog kantona dužne su osigurati privremeni smještaj prognanika iz Srebrenice u sve stambene jedinice koje su pogodnije za smještaj ljudi a do danas su ostale neuseljene iz bilo kojeg razloga.

Kao stambene jedinice iz prethodnog stava podrazumijevaju se: kuće, vikendice, stanovi i drugi objekti pogodni za stanovanje ljudi.

## II

Nadležni općinski organi će, pored stambenih jedinica iz prethodnog člana, izvršiti privremeni smještaj prognanika i u dio stambenog prostora za koji utvrdi da je višak.

Pod viškom stambenog prostora podrazumijeva se stambeni prostor koji prelazi 15 m<sup>2</sup> po članu porodičnog domaćinstva.

## III

Nadležni općinski organ koji izvrši privremeno useljenje prethodno će izvršiti popis stvari i namještaja u stanu.

## IV

Useljenje izvršeno po odredbama ove odluke trajaće privremeno, dok se ne iznađe adekvatan smještaj prognanika.

## V

Ovu odluku objaviti u "Službenim novinama Tuzlansko-podrinjskog kantona".

Republika Bosna i Hercegovina  
Federacija Bosne i Hercegovine

Predsjednik  
TUZLANSKO-PODRINJSKOG  
KANTONA

TUZLANSKO-PODRINJSKI  
KANTON

Izet Hadžić, v.r.

Vlada

Broj: 02/1-372-4117/95.  
Tuzla, 14. 7. 1995. godine

## 74

Na osnovu člana 25. stav 3. Zakona o Vladi Tuzlansko-podrinjskog kantona ("Službene novine Tuzlansko-podrinjskog kantona" br. 2/94) i člana 32. Zakona o ministarstvima i drugim organima uprave Tuzlansko-podrinjskog kantona ("Službene novine TPK" br. 3/94) Vlada Kantona, na sjednici od 6. 6. 1995. donosi:

**RJEŠENJE****O IMENOVANJU POMOĆNIKA MINISTRA ZA TRGOVINU I TURIZAM**

## I

DRAGAN KOVAČEVIĆ, dipl. ecc, imenuje se za pomoćnika ministra za trgovinu i turizam za oblast TURIZMA.

## II

Ovo rješenje objaviti u "Službenim novinama Tuzlansko-podrinjskog kantona".

Republika Bosna i Hercegovina  
Federacija Bosne i Hercegovine

Predsjednik  
TUZLANSKO-PODRINJSKOG  
KANTONA

TUZLANSKO-PODRINJSKI  
KANTON

Izet Hadžić, v.r.

VLADA

Broj: 02/1-120-3151/95.  
Tuzla, 6. 6. 1995. godine

## 75

Na osnovu člana 25. stav 3. Zakona o Vladi Tuzlansko-podrinjskog kantona ("Službene novine TPK" br. 2/94) i člana 32. Zakona o ministarstvima i drugim organima uprave Tuzlansko-podrinjskog kantona ("Službene novine TPK", br. 3/94) Vlada Kantona, na sjednici od 6. 6. 1995. donosi:

**RJEŠENJE****O IMENOVANJU SEKRETARA U MINISTARSTVU ZA  
OBNOVU I RAZVOJ**

## I

MUHAMED AGANOVIĆ, dipl. pravnik iz Tuzle, imenuje se za sekretara Ministarstva za obnovu i razvoj.

## II

Ovo rješenje objaviti u "Službenim novinama Tuzlansko-podrinjskog kantona".

Republika Bosna i Hercegovina  
Federacija Bosne i Hercegovine

Predsjednik  
TUZLANSKO-PODRINJSKOG  
KANTONA

**Izet Hadžić, v.r.**

TUZLANSKO-PODRINJSKI  
KANTON  
VLADA

Broj: 02/1-120-3151/95  
Tuzla, 6. 6. 1995. godine

**76**

Na osnovu člana 25. stav 3. Zakona o Vladi Tuzlansko-podrinjskog kantona ("Službene novine TPK" br. 2/94) i člana 32. Zakona o ministarstvima i drugim organima uprave Tuzlansko-podrinjskog kantona ("Službene novine TPK", br. 3/94) Vlada Kantona, na sjednici od 6. 6. 1995. donosi:

**RJEŠENJE****O IMENOVANJU SEKRETARA MINISTARSTVA ZA  
OBRAZOVANJE, NAUKU, KULTURU I SPORT**

## I

MERSIJA JAŠAREVIĆ, dipl. pravnik iz Tuzle, imenuje se za sekretara Ministarstva za obrazovanje, nauku, kulturu i sport.

## II

Ovo rješenje objaviti u "Službenim novinama Tuzlansko-podrinjskog kantona".

Republika Bosna i Hercegovina  
Federacija Bosne i Hercegovine

Predsjednik  
TUZLANSKO-PODRINJSKOG  
KANTONA

**Izet Hadžić, v.r.**

TUZLANSKO-PODRINJSKI  
KANTON  
VLADA

Broj: 02/1-120-3152/95.  
Tuzla, 6. 6. 1995. godine

**77**

Na temelju člana 22. stav 5. Zakona o Radio-televiziji Tuzlansko-podrinjskog kantona ("Službene novine Tuzlansko-podrinjskog kantona", 1/95) Vlada Kantona, na sjednici održanoj dana 29. 06. 1995. godine, donosi

**RJEŠENJE**

## I

Za vršioca dužnosti direktora Javnog preduzeća Radio-televizije Tuzlansko-podrinjskog kantona imenuje se Jusuf Suljkanović iz Tuzle.

## II

Ovo rješenje stupa na snagu odmah, a isto objaviti u "Službenim novinama Tuzlansko-podrinjskog kantona".

Republika Bosna i Hercegovina  
Federacija Bosne i Hercegovine

Predsjednik  
TUZLANSKO-PODRINJSKOG  
KANTONA

**Izet Hadžić, v.r.**

TUZLANSKO-PODRINJSKI  
KANTON  
VLADA

Broj: 02/1-120/3816/95.  
Tuzla, 4. 07. 1995. godine

**78**

Na osnovu člana 8. Zakona o ministarstvima i drugim organima uprave Tuzlansko-podrinjskog kantona ("Sl. novine Tuzlansko-podrinjskog kantona" br. 3/94) a u vezi sa odredbama Zakona o zaštiti životinja od zaraznih bolesti koje ugrožavaju cijelu zemlju ("Sl. list R BiH" br. 2/92) te člana 6. Pravilnika o mjerama za suzbijanje i iskorjenjivanje svinjske kuge ("Sl. list R BiH" br. 2/92), Ministar za poljoprivredu, šumarstvo i vodoprivredu, donosi:

**NAREDBU**

## I

U cilju suzbijanja i iskorjenjivanja zarazne bolesti SVINJSKE KUGE, na području Tuzlansko-podrinjskog kantona naređuje se sprovođenje slijedećih mjera:

1. Zabrana kretanja u prometu svih vrsta stoke a posebno uvoza svinja sa područja Hercegovine odnosno opština: Široki Brijeg, Grude, Tomislav grad i Mostar. Istovremeno zabranjuje se kretanje svinja sa područja opštine Brčko na područje ostalih opština Tuzlansko-podrinjskog kantona.
2. Izdvajanje zdravih od oboljelih životinja.
3. Zabrana kretanja svinja izvan zaraženog područja.
4. Ograničeno kretanje ljudi koji dolaze u dodir sa zaraženim životinjama.
5. Eutanazija životinja zaraženih svinjskom kugom.

## II

Naređuje se opštinskim veterinarskim inspektorima Tuzlansko-podrinjskog kantona da preduzmu odgovarajuće mjere a naročito obaveznu veterinarsko-sanitarnu kontrolu pri istovaru svih vrsta životinja.

## III

Ova naredba objavit će se u "Službenim novinama Tuzlansko-podrinjskog kantona".

Republika Bosna i Hercegovina  
Federacija Bosne i Hercegovine

MINISTAR  
**Vrtačić Idriz, dipl. ing., v.r.**

TUZLANSKO-PODRINJSKI  
KANTON

Ministarstvo za poljoprivredu  
šumarstvo i vodoprivredu

Broj: 04/1-50-3706/95.  
Tuzla, 29. 06. 1995. godine

**SADRŽAJ**

66	DEKLARACIJU o zaustavljanju i spriječavanju daljeg genocida nad narodom Srebrenice (bosanski jezik)		71	ODLUKA o utvrđivanju zaštitnih cijena određenih poljoprivrednih proizvoda	33
66	DEKLARACIJU o zaustavljanju i spriječavanju daljeg genocida nad narodom Srebrenice (hrvatski jezik)	29	72	ODLUKA o osnivanju Kriznog štaba za prihvatanje prognanika iz Srebrenice	33
67	ODLUKA o imenovanju savjetnika u Kabinetu Predsjednika Tuzlansko-podrinjskog kantona	30	73	ODLUKA o korišćenju neuseljelog stambenog prostora	34
68	UREDBA o vršenju upravnih i drugih stručnih poslova za korisnike boračko-invalidske zaštite sa opština čija je teritorija u cjelosti pod privremenom okupacijom agresora	31	74	RJEŠENJE o imenovanju pomoćnika ministra za trgovinu i turizam	35
69	ODLUKA o završetku školske 1994/95. godine	31	75	RJEŠENJE o imenovanju sekretara u ministarstvu za obnovu i razvoj	35
70	ODLUKA o davanju saglasnosti na Pravilnik o izmjenama i dopunama pravilnika o unutrašnjoj organizaciji i sistematizaciji radnih mjesta u ministarstvu za rad, socijalnu politiku i izbjeglice	32	76	RJEŠENJE o imenovanju sekretara ministarstva za obrazovanje, nauku, kulturu i sport	35
		33	77	RJEŠENJE o imenovanju direktora Javnog preduzeća Radio-televizije Skupštine Tuzlansko-podrinjskog kantona	35
			78	NAREDBA u cilju suzbijanja i iskorjenjivanja zarazne bolesti SVINJSKE KUGE na području Tuzlansko-podrinjskog kantona	35